

I.A -CONTRATOS-PROGRAMA CON GRUPOS DE INVESTIGACIÓN

1.- OBXECTIVOS

Esta acción ten como obxectivo principal facilitar o financiamento dos grupos de investigación de calidade da Universidade de Vigo e contribuír ao incremento da súa competitividade na captación de recursos externos de I+D+i. Este programa de axudas debe servir para que os grupos de investigación que estean en condicións de concorrer ás convocatorias autonómicas anuais para grupos de investigación sobresaíntes, e que non resulten adxudicatarios, poidan dispoñer dun financiamento estrutural que lles permita mellorar suficientemente a súa organización, estratexia e resultados, para ter éxito nunha próxima convocatoria. Polo tanto, a adxudicación destes contratos-programa debe estar ligada á resolución das mencionadas convocatorias autonómicas, e máis concretamente aos grupos que sendo solicitantes nestas, resultasen ben valorados pero non conseguisen ser adxudicatarios.

A subvención debe facilitar o funcionamento dos grupos con financiamento flexible e adaptado ás súas necesidades, mediante a fórmula do contrato-programa, para o que a Investigadora ou Investigador Principal propondrá unha planificación de actividades. A concesión destas axudas está asociada á resolución da convocatoria autonómica de axudas estruturais a grupos do ano 2017.

Quen sexa solicitante das subvencións comprométese a solicitar as axudas análogas da Xunta de Galicia e Ministerios de Educación e de Economía, Industria e Competitividade, en caso de existir convocatoria en calquera momento dos anos 2017 e 2018, e de cumprir os requisitos. De serlle concedida algunha destas axudas, procederíase á rescisión da subvención da Universidade de Vigo.

Os grupos de investigación aos que se lles conceda unha axuda deste programa teñen a obriga de manter durante o tempo de desfrute da mesma, como mínimo, a composición do grupo rexistrada na data de fin de prazo de presentación de solicitudes. Nembargante, poderá realizarse durante o período de desfrute da axuda calquera cambio na composición do grupo que supoña incremento no número de membros, e polo tanto da masa crítica e do currículo do mesmo.

2.- APLICACIÓN ORZAMENTARIA

Estas axudas financiaranse con cargo á aplicación orzamentaria 00VI 131H 641.02 Axudas propias á investigación e á transferencia. Poderanse conceder axudas no ano 2017 para esta modalidade ata un número previsto de 15 grupos, de existir candidatos axeitados.

3.-SOLICITANTES

Poderán solicitar estas axudas os grupos de investigación da Universidade de Vigo que sexan admitidos como solicitantes na convocatoria de *Axudas para a consolidación e estruturación de unidades de investigación competitivas do SUG para o exercicio 2017* da Consellería de Cultura, Educación e Ordenación Universitaria, nas modalidades de *Grupos de Referencia Competitiva* e *Grupos con Potencial de Crecemento*, pero non sexan adxudicatarios das mesmas.

4.- FORMALIZACIÓN DAS SOLICITUDES E PRAZO DE PRESENTACIÓN

As solicitudes en modelo normalizado I, dirixiranse ao sr. reitor da Universidade de Vigo. Os grupos que cumpran o requisito indicado no apartado 3, unha vez coñecida a proposta de adxudicación das axudas mencionadas, serán invitados a presentar a solicitude dentro do prazo que se lles indique na propia invitación.

5.- AVALIACIÓN E SELECCIÓN

A Comisión de Investigación, delegada do Consello de Goberno, arbitrará os mecanismos e medios para proceder á avaliación e selección das solicitudes presentadas. Para a concesión teranse en conta os resultados obtidos polos grupos de investigación da Universidade de Vigo na resolución da convocatoria de *Axudas para a consolidación e estruturación de unidades de investigación competitivas do SUG para o exercicio 2017* da Consellería de Cultura, Educación e Ordenación Universitaria, nas modalidades de *Grupos de Referencia Competitiva* e *Grupos con Potencial de Crecemento*. Segundo a puntuación obtida na resolución da devandita convocatoria, a Comisión de Investigación da Universidade de Vigo elaborará una proposta de concesión, podéndose establecer unha puntuación mínima necesaria. Establecerase un cupo mínimo de dous grupos por ámbito de coñecemento, caso de existiren candidatos axeitados, co fin de premiar os mellores grupos dentro de cada ámbito. Na proposta de concesión establecerase, de ser posible, unha lista de agarda na que se incluírán, por orde de prioridade, os grupos que superen uns mínimos de calidade ó xuízo da Comisión de Investigación, pero que non acaden a puntuación suficiente para a concesión da axuda.

6.- NATUREZA E CONTÍA DAS SUBVENCÍONS

As axudas que se concedan deben considerarse destinadas a financiar a investigación do grupo durante un máximo de 18 meses, comprendidos entre o 1 de xullo de 2017 e o 31 de decembro de 2018. A concesión da axuda non implica ningún compromiso por parte da Universidade no mantemento da mesma para anos posteriores.

A contía total máxima das subvencións concedidas será de 20.000 € que se librá en dúas anualidades, a primeira de 5.000 € e a segunda de 15.000 € podendo a Comisión de

Investigación establecer distintos niveis de financiamento segundo o tipo de axuda solicitada á convocatoria da Xunta de Galicia (*Grupo de Referencia Competitiva* ou *Grupo con Potencial de Crecemento*) e as puntuacións obtidas polos grupos solicitantes. No caso de que a resolución das axudas de Consolidación da Xunta de Galicia sexa posterior ao 31 de outubro de 2017, os grupos poderán solicitar que a totalidade da axuda se dote no exercicio 2018.

A data máxima para a execución de cada anualidade é o 31 de decembro do ano correspondente, sen prexuízo do cumprimento obrigado das normas de peche de cada exercicio económico. En ningún caso se autorizará a incorporación do remanente dunha anualidade ao exercicio económico do ano seguinte.

En caso de existir renuncias ou rescisións da axuda a algún dos grupos adxudicatarios antes do 31 de outubro de 2017, o importe máximo de 15.000 € da segunda anualidade da axuda será adxudicado aos grupos que corresponda segundo a lista de agarda publicada na proposta de concesión, sen que isto supoña variación no período de gasto.

7.- OBRIGAS DOS GRUPOS BENEFICIARIOS

No prazo de dous meses contados a partir do remate do prazo de aplicación da subvención, o investigador ou investigadora principal do grupo deberá presentar na Vicerreitoría de Investigación e Transferencia un informe final, no que se recollan tódolos resultados e utilidades que para as liñas de investigación supuxo a subvención concedida.